

F A C T V M,

Pour Marie Guillochon, vefue de defunct Maiftre Antoine Hired, François Sauarre, fils de defunct Maiftre Jacques Sauarre, Bailly de Chateaugnault & Catherine Guillochon les pere & mere, tant en son nom, que comme Curateur de Jean & Ioseph Sauarre les freres, Perrine Sauarre vefue de feu Maiftre Macé Lemée, Tous heritiers de ladite defuncte Guillochon, & François Broffillon Escuyer, fils & heritier de defuncte Damoiselle Christophlette Guillochon, au iour de son deceds vefue de feu François Broffillon, Escuyer Sieur de Fontaines, ayans repris au lieu desdites Catherine & Christophlette Guillochon, intimez & defendeurs, & incidemment demandeurs en Requête par eux présentée à la Cour le 27. Nouembre 1651. & en Lettres du 20. Aupil 1652.

Contre Jean Seruant, foy-disant Curateur aux biens cedez par Maiftre Robert Guillochon, cy-deuant Lieutenant du Preuost des Mareschaux de Tours, Maiftre Pierre Guillochon, Aduocat en la Cour, & Magdelaine Guillochon, ses enfans, & de defuncte Vrbaine Oudin sa femme, eux difans creanciers comme heritiers de ladite Oudin sur lesdits biens cedez, appellans du Presidial de Tours, demandeurs, & incidemment defendeurs en ladite Requête & Lettres.

LA vefue Hired & ses conforrs gemissent depuis 34 ou 35 ans pour le fait des partages & rapports de la succession de leurs pere & mere, sous la tyrannie dudit Robert Guillochon leur frere aîné, qui est vn homme perdu, lequel a plus emporté de bien de la maison que deux des autres, & lequel ne pouuant plus chicanner sous son nom, emprunte celuy d'un Curateur particulier qu'il a fait creer aux biens dont il a fait cession à ses creanciers, quoy qu'il y en ait vn autre qui n'y peut consentir; & a instruit son fils qu'il suppose son Creancier, quoy qu'il ne le soit point du tout, lequel marche sur ses mesmes pas, & encherit encore sur luy, pour verifier ce Prouerbe ancien des Grecs, d'un meschant Corbeau, vn mauuais œuf; Le pere & le fils agissent ensemble, & prennent aussi le nom de Magdelaine Guillochon, pour persecuter les sœurs, les tantes, les neveux & les cousins, & en font trophée. Les veritables Creanciers dudit Robert Guillochon, qui sont les seuls interessez, ne participent point à tout cela, parce qu'ils scauent & est de notorieté publique dans la Prouince de Touraine, que c'est la plus haute persecution qui ait iamais esté faite; Voires en la personne de ladite vefue Hired qui a sauué plusieurs fois la vie audit Robert Guillochon, & qui a cent & cent fois oublié ses outrages & ses perfidies, & s'est oubliée foy-mesme pour le rachepter des mains de la Iustice, & le combler de biens-faits luy & ses enfans, qu'ell'a tirez de la misere, mesmes payé les norritures de ladite fille, c'est la plus horrible ingratitude qui se puisse représenter; Et cette tache marque l'ame de ces gens là: *Ingratos dixeris, omnia dixisti*, disoit vn Ancien.

Le decez du pere commun des parties, Marchand à Tours, est arriué dès le mois de Iuillet 1620. Et le decez de la mere est arriué dès le mois de Ianuier 1624. Ledit Robert Guillochon, qui estoit l'aîné esdites successions, & qui auoit esté le plus auancé, ne vouloit point de partage ny d'esclaircissement, aimant mieux



toufiours pefeher en eau trouble. Et parcé qu'alors, il auoit vne facheufe affaire fur les bras pour le meurtre par luy commis de la personne d'un nommé Belon dit Chalouere, qui luy eust cousté la vie, & vn autre encôre commis dix ans apres de la personne du nommé Babault, sans l'entremise & les soins de ladite vefue Hiret, qui à chaque fois s'est engagée de tout ce qu'ell'auoit au monde pour accommoder & le tirer de prison sans souffrir que les procez fussent jugez, ladite vefue Hiret & ses coheritiers vserent de tant de remises en attendant la commodité dudit Robert Guillochon, que les affaires desdites successions s'endommageoient à veuë d'œil. Cependant, ledit Robert Guillochon prenoit par tout, & receuoit de tous costez. Enfin, il fallut entrer en procez pour le fait dudit Partage, & rapports d'un chacun, pardeuant le Preuost de Tours Iuge naturel des parties, & neantmoins doucement & avec de longs interualles, sans precipitation. Il y eut vn premier Iugement le 30. May 1624. pour proceder audit partage, & vn autre du 13. Decembre ensuiuant, desquels ledit Robert Guillochon interjeta temerairement appel comme de Iuge incompetent, qui tint les choses en suspens iusques au 19. May 1626. que par Arrest de la Cour les Sentences furent confirmées. Apres quoy les parties retournées deuant ledit Iuge, & procedans audit Partage en execution de l'Arrest, ledit Robert Guillochon interjeta encore appel des Iugemens preparatoires des 10. & 17. Fevrier 1627. qu'il qualifia comme de Iuge incompetent, nonobstant lequel il fut passé outre; Et ledit Robert ayant demandé des defences particulieres à la Cour, elles luy furent refusées par Arrest du 29. Mars audit an. Si bien que le Partage fut fait entre tous les coheritiers, le Substitut de Monsieur le Procureur General agissant pour ledit Robert Guillochon, & dans la plus grande égalité qu'il fut possible, les lots tirez au sort. Et apres cela, chacun jouit du sien, mesmes ledit Robert, qui le trouua si bon, qu'il executa volontairement ledit Partage comme les autres. Neantmoins quatre ou cinq ans apres, voyant que ses sœurs auoient disposé des heritages à elles escheus, il voulut se réveiller pour les broüiller avec des pretextes de chicaneur sieffé; & pour cela il falloir reprendre les erremens des appellations qu'il auoit abandonnées: Mais elles se treuuerent peries, & furent telles déclarées avec despens tant de l'instance de peremption que de la cause d'appel, par Arrest contradictoire du 16. Avril 1633.

Trois ans apres, & en l'année 1636. ce broüillon se raduise encores de tourmenter ses sœurs par vn nouuel appel de ce mesme Partage, consommé & executé, porte cét appel au Presidial de Tours, où tout ainsi que s'il eust fait casser tous les Arrests, & les parties remises en tel estat qu'elles estoient auant ledit Partage, il forma vne multitude d'incidens & demandes pour embarasser ses sœurs qui estoient trois vefues, ne demandant rien contre Pierre Guillochon leur frere; ce que la Cour obseruera, s'il luy plaist. Et elles, pour se redimer de vexation, & pour n'auoir iamais de procez avec luy, se laisserent aller à vne Transaction passée avec luy le 28. Octobre 1639. Par laquelle pour n'auoir iamais rien à demesler avec ledit Robert Guillochon, & viure sans procez; ce sont les termes plusieurs fois repetez de l'acte, elles luy cederent ou firent remise de plus de quatre mill liu. qu'il a butinées sur elles, qui est comme si elles luy auoient payé rançon. Or cette Transaction est si generale, qu'elle ne laissoit audit Robert Guillochon aucune matiere de chicaner, que par vne contrauention ouuerte.

Mais ce mauuais esprit, accoustumé à mal faire, n'eut point de cesse que huit iours apres, & le 5. Nouembre ensuiuant, il n'eust extorqué par blasphemés & menaces, vn acte tout contraire, & preparant de nouueaux procez, par la restriction de certains effets perceus par lesdites vefues, à vne somme de trois cens liu. luy qui en auoit receu six fois dauantage. Incontinent apres quoy, & dès le lendemain il a mis en procez tous ceux qui auoient esté debiteurs desdites successions, & a brassé à ces pauures vefues vn procez plus gros & plus facheux incomparablement que le premier, qui n'auoit fondement quelconque: Car pour leur prouuer qu'elles auoient receu plus de trois cens liu. Il n'y a point de ruse dont

il ne se soit aduifé pour les embarrasser & molester. D'abord elles ont protesté de nullité de l'acte extorqué, diametralement opposé, & contraire à la Transaction generale faite pour n'auoir iamais de procez ensemble; Acte nul & sans cause. Et neantmoins n'estimans pas qu'elles eussent receu plus de trois cens liures, & sous leurs protestations, qui sont inserées en la Sentence de Tours, elles se sont deffenduës; & de fait, il ne se trouueroit pas au compte dudit Robert Guillochon, & en luy passant plusieurs articles douteux, plus que de ladite somme de trois cens liu. *circumcirca*, Il n'y auroit pas vne pistolle dauantage.

Mais, enfin, comme elles n'ont point trouué le fruit qu'elles auoient esperé, & qui leur estoit promis en donnant leur bien, par la Transaction du 28. Octobre 1639. qui n'a esté faite qu'avec la seule pensée de se redimer de vexation, & pour n'auoir iamais de procez ensemble, qui en est la cause finale exprimée & repetée en icelle, dequoy il n'y a pas d'allieurs matiere de douter, puis qu'elles estoient fondées en vn Partage solennel fait en Iustice, legalement, confirmé par Arrest, consommé & executé par toutes les parties douze ans durant: Elles ont baillé leur Requête à la Cour le 27. Nouembre 1651. contenant l'histoire abbregee de tous les maux & persecutions que ledit Robert Guillochon leur a fait souffrir, dont il n'y a pas vn seul article qui ne soit verifié par escrit, & par quel desespoir elles ont passé ladite Transaction avec luy, & donné plus de quatre mil liures, pour n'auoir iamais rien à demesler ensemble, & s'exempter de tous procez à l'auenir. Et au contraire ayans de plus grands procez qu'auparauant, ladite Transaction est sans fruit pour elles, & ainsi la cause finale eludée. Pour raison dequoy elles ont conclud à la resolution de ladite Transaction, & de tout ce qui s'en est ensuiuy, *ob finalem causam non secutam*. Et incidemment, & entant que besoin seroit, ont obtenu Lettres le 20. Aueil 1652. contre l'acte contraire à ladite Transaction, extorqué par mauuais artifice & sans cause quelconque le 5. Nouembre, & toute ce qui s'en est ensuiuy. Voila donc la face de l'affaire, & surquoy il eschet de prononcer.

La premiere objection qui est faite contre ces Conclusions, est le temps. On dit que l'on ne s'est pas pourueu dans les dix ans de l'Ordonnance; & au contraire que l'on a executé l'acte du 5. Nouembre dont il s'agit, sans protestation. A quoy double responce. Premièrement qu'il n'est pas vray que l'on ait executé ledit acte sans protestation, comme il a esté justifié, que les trois vefues n'ont defendu que subordonnément à certe protestation de nullité, & de se pouruoir contre ledit acte extorqué. Secondement, il n'est pas de l'action en resolution d'un contract, comme de la rescision. L'Ordonnance veut que les defauts & nullitez d'un contract soient réparées par vn silence & vne execution volontaire de dix années: Mais la resolution d'un contract est vne action commune qui est perpetuelle comme l'acte mesme, parce qu'elle naist du contract que l'on confesse bon & valable, mais qui se doit resoudre par le defect d'execution, & par la priuation de l'effet esperé, & n'y a point de temps moindre que de trente ans, du iour que la cause à la resolution est apparüe, qui est vne chose incertaine, & qui ne despend que de l'euement, consequemment qui ne peut pas estre bornée comme la rescision, & c'est vne doctrine indubitable.

La 2. objection est, que toutes Transactions se font pour terminer des procez, & que neantmoins il ne s'ensuit pas que si en execution d'une Transaction il y a procez, la Transaction doie estre pour cela resoluë. Responce. Toutes Transactions ne sont pas precises & formelles comme celle du 28. Octobre, pour n'auoir jamais de procez ensemble, & pour sortir nettement de toutes affaires. L'on n'a pas seulement pensé à assoupir le procez pendant à Tours, mais l'on a trauaillé à cimenter vn Acte, par lequel ces pauures vefues eussent vne paix de sel, incorruptible & perpetuelle, & qu'elles n'eussent jamais de procez avec ledit Robert Guillochon à l'aduenir. C'est la cause finale & impulsue desdites trois vefues, qui luy ont donné rançon pour cela de plus de quatre mil liures, dont il a profité à leur dommage, pour promettre qu'au moyen de ce, il ne leur feroit point de procez: A quoy

manquant, & lesdites veſues n'ayans aucun fruit de ladite Tranſaction, & ſe trou-
uans priuées de tout ce qu'elles auoient eſperé en donnant leur bien, l'action ſe
prepare pour la reſolution du Contract en leur faueur, *ob ſinalem cauſam non ſecutam*,
parce que c'eſt le cas & la condition tacite & inherente au negoce, *qua vi ipſa ineſt*,
l. 1. ff. de cond. & dem. Sans cette eſperance & cette promeſſe de paix perpetuelle, ja-
mais le Contract n'eult eſté fait, *non alias contracturus*. Telle eſt l'opinion de M^e
Charles du Moulin, ſur la Rubr. *de verb. oblig.* & il y en a des titres tous entiers dans
le Droit. Les Loix qui ſont amies des hommes, non ſeulement admettent ces re-
ſolutions de Contracts par la cauſe finale des contractans, que dans l'euenement
on veut frustrer de ce pourquoy ils ont contracté: mais elles veulent meſmes que
les majeurs embarras & contrains de donner leur bien par la chicanne de leurs
parties, ſoient reſtituables en vertu de la clause de l'Edict du Preteur, *ſi qua mihi
iuxta cauſa uidebitur*, dont il eſt dit que les eſpeces ſont infinies comme les actions
de l'eſprit. Et neantmoins cellecy a eſté préueuë & propoſée par le Iuriſconſulte
en la Loy 24. ff. *Ex quibus cauſis maiores in integrum reſtituuntur*, dont les termes ſont
conuenables au ſujet qui ſe preſente: *Qui quadam tergiverſatione & ſolertia efficiunt
ne cum ipſis agi poſſit*. Que ſi la reſtitution eſt infaillible, à plus forte raiſon la reſo-
lution du contract par le défaut d'exécution & de realité des promeſſes, ſans les-
quelles on n'auroit jamais donné la rançon qui a eſté accordée par vn conſente-
ment forcé & exigé du plus foible.

Où y mais (dit-on) ce n'eſt pas en execution de la Tranſaction du 28. Oct. que
les parties plaident: mais bien de l'acte du 5. Nouembre qui l'a interpretée. Reſ-
ponſe. Vn acte qui en deſtruit vn autre ne l'interprete pas. Par la tranſaction du
28. Octobre, la porte eſt entièrement fermée à tous procez, & n'eſtoit faite que
pour cela. Et par celui du 5. Nou. ell'eſt ouuerte aux plus faſcheux procez qu'ils
euſſent encor euz enſemble. Le dol & la captation y eſt donc euidente, & comme
celuy-la eſt euidentement contraire, captieux & fait ſans cauſe, comme la lecture
le fait voir, il ne peut pas ſubſiſter; & à vray dire les deux Actes du 28. Octobre &
du 5. Nouembre *sibi inuicem obſtant*; ils ſe broüillent l'un l'autre, & ce dernier de-
figure le premier, de telle ſorte que ce n'eſt plus luy-meſme. Or les Contracts &
Obligations des hommes ne ſubſiſtans point ſans cauſe, ce dernier n'a jamais eu
de force. Et ne faut point dire que c'eſt qu'il y auoit du mal-talent en la paſſation
du premier, dequoy ledit Robert Guillochon s'eſtoit plaint: parce que ce n'eſt
qu'une ruse du perſonnage, inuentée contre verité & par malice, & de fait tenuë
ſecrete & ſans ſignification quelconque; & en vn mot qui n'a pas ſeruy de fonde-
ment ny de cauſe audit Acte du 5. Nouembre, puis qu'il n'en eſt parlé ny près ny
loin en façon quelconque. Donc il y a lieu à la reſolution de la Tranſaction du 28.
Octobre, *ob cauſam ſinalem non ſecutam*; ſubordinement à la reſciſion de l'acte du 5.
Nouembre entièrement contraire & oppoſé, extorqué ſans cauſe & ſans raiſon
par ſurpriſe & avec deſiuremens & blaſphemes que ces pauvres veſues ne pou-
uoient ouir ſans horreur. Et combien que par quelques circonſtances il ſe preſen-
taſt des difficultez à les ſecourir & les retirer de l'oppreſſion de ce mauuais frere, &
de ſon fils qui l'imite parfaitement, ou qui fait encore pis, de ces endureis à mal-
faire, de ces ingrats & meconnoiſſans, la Cour les diſſipera ſ'il luy plaist, par ce
Precepte des Iuriſconſultes, qui eſt la 183. des Regles de Droit: *Et ſi nihil facile
mutandum ſit ex ſolemnibus, tamen ubi equitas euident poſcit, ſubueniendum eſt*.

Monsieur DV TRONCHAY, Rapporteur.

